

A influencia das TIC centra unhas xornadas de ciencia e comunicación - Diario de Pontevedra - 30/10/2017

# A influencia das TIC centra unhas xornadas de ciencia e comunicación

► Medio cento de investigadores participa nas actividades que promove a Asociación Española de Investigación da Comunicación no Campus

PONTEVEDRA. Medio cento de investigadores de universidades de toda España danse cita hoxe e mañá en Pontevedra nas II Xornadas Científicas de Comunicación Organizacional, Novas Formas de Publicidade e Relacións cos Públicos da Asociación Española de Investigación da Comunicación (AE-IC), que se desenvolven na Facultade de Ciencias Sociais e da Comunicación. Expertos nos eidos da comunicación, as relacións públicas, a publicidade e o xornalismo, procedentes de diferentes universidades españolas, tomarán parte neste encontro organizado pola AE-IC xunto co grupo de investigación CP2.

Trátase dunhas xornadas promovidas pola sección de Comunicación estratéxica e organizacional da asociación máis grande de España de profesorado e investigadores do ámbito da comunicación que pretenden dar resposta á pregunta de como a sociedade da comunicación e as TIC teñen

Estas xornadas pretenden dar resposta a como as TIC teñen mudado as relacións das organizacións co seu público

variado nos últimos anos as relacións das organizacións cos seus públicos.

Os diferentes aspectos que entran en xogo na comunicación de organizacións públicas e privadas son o eixo do traballo desta sección, que dirixe o profesor da USC Francisco Campos e da que forman parte varios investigadores da facultade, sección que promove anualmente unhas xornadas científicas dirixidas a poñer en común as diferentes investigacións e liñas de traballos dos investigadores e investigadoras da asociación neste eidos.

**O PROGRAMA.** Estructurado en seis mesas redondas -sobre comunicación organizacional, comunicación política e medios sociais, difusión da investigación, relacións públicas e cos públicos, novas formas de publicidade e visións estratéxicas e tendencias-, as xornadas que o grupo CP2 promove coa colaboración da Vicerreitoría do campus, permitirán reunir en Pontevedra a algunhas das persoas que están levando a cabo as investigacións máis pioneiras e exitosas no ámbito da comunicación que se están producindo en España.

O investigador da Universidad Jaume I de Castellón Andreu Casero ou o profesor da Complutense



Facultade de Ciencias da Comunicación. OLGA FERNÁNDEZ

de Madrid Timoteo Álvarez, xunto con representantes do eido profesional como a directora de comunicación do 112 en Sevilla, Pilar Limón, figuran entre os preto de 20 relatores e relatoras que participarán nestes seis paneis, aos que se sumará a presentación de máis de 50 comunicacións de distintos investigadores.

O programa destas xornadas

científicas que acolle durante o día de hoxe o campus pontevedrés complétase cunha sesión de presentación de libros e proxectos dos e das integrantes desta sección, que terá lugar mañá. Tamén se dará conta de tres proxectos de investigación, financiados polo Ministerio de Economía y Competitividad promovidos por integrantes da rede.